

Quest onn cun gronda participaziun grischuna

Linguissimo, la concorrenza svizra per giuvenils

DA FLURIN ANDRY / ANR

■ **Per la terza giada èn giuvenils tranter 16 e 20 onns da tut las quatter cuminanzas linguisticas envidads da sa participar a la concorrenza svizra Linguissimo. Fin uss èn s'annunziads 7 giuvenils rumantschs.** Punts sur «Le Röstigraben svizzero»: Cun l'intent da promover la chapientscha vicendaivla tanter las cuminanzas linguisticas en Svizra ha il Forum Helveticum (FH) lantschà d'atun 2008 il project «Linguissimo». L'emprim onn hai dà mo in text rumantsch, scrit dad in giuvenil da Berna che ha emprendì rumantsch. A la segunda concorrenza 2009/10 den-

tant han prendì part 12 giuvenils rumantschs. Per il Linguissimo actual èn s'annunziads per entant 7 giuvenils da lingua rumantscha. «Fin ils 14 favrer pon giuvenils interessads anc s'annunziar per la concorrenza da quest onn», di *Paolo Barblan*, il manader da gestiun da la FH e dal project Linguissimo, «ils texts pon els alura inoltrar fin la fin da favrer.» El explitgescha la concorrenza.

L'inscunter dal 2012 en territori rumantsch

En l'emprima runda vegn organisada ina concorrenza da scriver en l'inter-net: «Giuvenils da tut las regiuns lin-

guisticas inoltreschan dus texts curts, l'in en lur lingua materna davart il tema da la concorrenza e l'auter cun in autopurtret en in'otra lingua naziunala», declera Barblan. En la segunda runda passentan alura las auturas ed ils auturs da las 30 meglras lavurs ensemen ina fin d'emna numnada «l'inscunter da linguas». Durant quella han els l'ocasiun da s'inscuntrar cun experts dal tema da la concorrenza, uonn «ils meds stampads ed ils meds online», e da scriver cun in partenari d'ina altra regiun linguistica in text communabel. Ils meglers trais «tandems» survegnan in premi. «Cun il project è collià in 'Tour de Suisse', infurmescha

Paolo Barblan ch'è oriund da Vnà, «mintg'onn vegn relisà l'inscunter da linguas en in'otra regiun linguistica.» L'emprim inscunter è stà dal 2009 a Lenzburg (AG), il segund l'onni passà a Bevaix (NE), quest onn sa chattan ils participants a Locarno (TI). «Proxim onn ha lieu l'inscunter da linguas en territori rumantsch, nua nun è anc decidì.»

«Er grazia a l'engaschament da la magistraglia»


«Tar las emprimas duas concorrenzas era la participaziun grischuna mo modesta, l'onni passà na s'han dal Grischun talian participads schizunt na-

gins giuvenils», di il manader da project. Quest onn però s'han annunziads fin uss 44 giuvenils grischuns, 7 da lingua rumantscha, 15 da lingua taliana e 22 da lingua tudestga. «Questa bella participaziun grischuna è stada pussaivla grazia a la buna collavuraziun cun la magistraglia che ha fatg reclama per nosa concorrenza e che sustegna lur scolaras e scolars che sa particepschan», concluda Paolo Barblan.

Ulteriuras infurmaziuns ed il talun d'annunzia chattan ins sin www.linguissimo.ch.

Reponderar la situaziun actuala da la Svizra

Il Forum Helveticum (FH) è vegnì fundà dal 1968 sco associaziun independenta, confessionalmain e politicamain neutrala. El è naschì dals sforzs per instituzionalisar ina «Conferenza naziunala per reponderar la situaziun actuala da la Svizra». Il FH vul promover la discussiun davart dumondas da la vita publica, surtut davart il svilup da la societad, la politica e la cultura en Svizra. Ina finamira essenziala è la chapientscha vicendaivla tranter las quatter cuminanzas linguisticas en Svizra. Il comitè directiv dal FH vegn presidià dal publicist *Roy Oppenheim*, Lengnau; il manader da gestiun e dal project Linguissimo è Paolo Barblan, Basilea; represchentant dal chantun Grischun è il romanist e mediat-ur cultural *Chasper Pult*, Pasqual.



Fin ils 14 favrer pon s'annunziar anc ils giuvenils che avessan interess da sa participar a la concorrenza svizra Linguissimo.

MAD